

VICTORIOUS LIFE SERIES

1. UPAT KA KLAKE NGA YUTA
2. PAGLUTOS
3. PAGHATAG UG PASAYLO
4. PRESENSYA SA DIOS 1
5. PRESENSYA SA DIOS 2
6. PAGPUASA
7. MADAOGON NGA KINABUHI
8. LAKAW UG AYAW NA PAGPAKASALA 1
9. LAKAW UG AYAW NA PAGPAKASALA 2
10. PUTLI NGA KASING KASING
11. PAGLAKAW UBAN SA DIOS
12. NGANONG ANG UBAN NAPALPAK

UPAT KA KLAKE NGA YUTA (Victorious Life Series: Lesson 1)

“Pamati kamo! May usa ka tawo nga miadto sa uma aron pagpugas. Samtang nagsabod siya, may mga binhi nga nahulog sa **daplin sa agianan**, ug miabot ang mga langgam ug gipanuka kini. Ang ubang binhi nahulog sa **yuta nga batoon**, ug tungod kay mabaw ra man ang yuta niini, dali ra kining miturok. Apan sa dihang nainitan na kini pag-ayo sa adlaw, nalawos kini; ug kay wala man makagamot pag-ayo nalaya. Ang ubang binhi nahulog sa **dapit sa mga sampinit**. Unya mitubo ang mga binhi nga nahulog sa **maayong yuta**, ug miturok, mitubo, ug nanguhay. May nanguhay ug katloan, ang uban tagka-uman, ug ang uban taggatos.”

Marcos 4:3-8

PINAKA-IMPORTANTE NGA SAMBINGAY

Usa kini sa mga pinaka-importante nga sambingay nga sulat. Kini nga sambingay anaa sa tulo ka mga libro sa Biblia, Mateo 13, Marcos 4, ug Lukas 8. **Nag-ingon si Ginoong Jesus ngakungdili nato masabtan kini nga sambingay** dili kita makasabot sa ubang mga sambingay (Marcos 4:13). Nagpasabot nga usa kini ka patukuranan nga pagtulon-an ug kung dili nato makuha dili kita makapadayon sa ubang pagtulon-an sa Gingharian. Dili usab kini lisod sabton nga parabolo ilabi na niadtong adunay dalungan nga maminaw (Marcos 4:9).

ANG DIOS MAO ANG MAG-UUMA

Naghisgot kini nga sambingay sa usa ka mag-uuma nga nagpugas ug mga binhi sa iyang mga “maayong binhi” nganhi sa atong kinabuhi ginamit ang ubang mga tawo nga iyang instrumento.

ANG LISO MAO ANG PULONG SA DIOS

Ang kahulogan sa “mga liso” sa sambingay mao ang “pulong sa Dios” (Marcos 4:14), diin aduna kini gahom ug katakos nga makabunga ug tag-gatos ka-pilo unsay ginatanom (Lukas 8:8). Walay katakos ang yuta nga makabaton ug mga maayong bunga kung wala ang maayong liso (Pulong sa Dios). Sa atong kaugalingon dili gyud kita makapamunga ug mga maayong bunga gawas kung ang pulong sa Dios mosulod sa atong kinabuhi.’

ANG YUTA MAO ANG KASINGKASING SA TAWO

Ang atong kasingkasing mao ang yuta nga gitanatamnan sa Dios sa iyang pulong (liso). Ang pagpamunga sa maayong liso nga gitanom nag-agad usab sa kalidad ug klase sa yuta nga gitamnan. Puwede nga ang pulong sa Dios natanom sa usa ka tawo pero dili kini makapamunga tungod kay ang iyang kasingkasing dili maayo. **Ang ‘maayong liso’ kinahanglan matanom sa ‘maayong yuta’ aron motubo ug mamunga.**

UPAT KA KLAKE NGA YUTA

Naghisgot kini nga sambingay ug upat ka klase nga yuta, diin ang kahulogan mao ang upat ka klaseng kasingkasing sa tawo (Palihog basaha ang Marcos 4:14-20).

1. **Gahi nga Yuta** (Marcos 4:15)

- Naghisgot kini sa mga tawo nga ilang gigahi ang ilang mga kasingkasing sa mensahe sa Dios ug tungod niini gisakmit sa panulay ang maong pulong ug wala sila makabaton ug kaluwasan (Lukas 8:12). naghisgot kini sa mga tawo nga wala pa nakabaton ug kaluwasan tungod sa kagahi sa ilang mga kasingkasing. Walay luna ang pulong sa Dios sa ilang mga kasingkasing.

2. **Batoon nga Yuta** (Marcos 4:16-17)

- Naghisgot kini sa mga tawo nga malipayong midawat’ sa Maayong Balita, apan ang pulong sa Dios wala gayod makagamot pag-ayo tungod kay ilang mga kasingkasing dili buo (ang yuta dili tabunok hinuon daghan kini ug mga bato). Sa panahon sa mga *pagsulay*, *paglutos ug mga problema* (kainit sa adlaw) miatras sila sa ilang pagsunod sa Ginoo. Kini nga mga pagsulay miabot tungod sa pulong sa Dios nga ilang gidawat (Mateo 13:21). Mga Kristohanon kini sila nga maayo ang pagsugod apan tungod sa mga kalisdanan nga ilang nahiagoman sa unahan wala makalahutay.

3. **Sampiniton nga Yuta** (Marcos 4:18-19)

- Naghisgot kini sa mga tawo nga midawat sa mensahe sa Dios, ug nagsugod na pagtubo dinha sa Ginoo (nagsugod na pagtubo ang liso sa Dios sa ilang mga kinabuhi) pero sa wala madugay adunay mga sampinit nga mitubo diin mituok ug milumos sa mga tanom. Ang mga sampinit naghisgot sa mga...

- i. **Kabalaka niining kinabuhia** (Marcos 4:19)
- ii. **Gugma sa salapi** (Marcos 4:19)
- iii. **Nagkalainlaing pangandoy sa kinabuhi** (Marcos 4:19)
- iv. **Kahilayan niining kalibutan** (Lucas 8:14)

■ Kining upat ka mga butang maoy hinungdan nganong dili sila kahinugan ug mga bunga. Kini nga mga Kristohanon nagpabiling mga bata sa Ginoo. Wala sila nagbaton sa bunga sa Espiritu Santo ug wala sila nagamit sa Dios sa iyang katuyoan.

4. Maayo nga Yuta (Marcos 4:20)

- Naghisgot kini sa mga Kristohanon nga adunay maayong mga kasingkasing tali sa pulong sa Dios (maayo nga yuta nga midawat sa maayo nga liso).

Sila mao ang mga:

- i. Nakasabot sa Pulong sa Dios (Matteo 13:23)
 - Aron kita makasabot sa pulong sa Dios kinahanglan magbaton kita ug “kagutom sa pagsabot.” Kay ang mga tinago sa Ginharian sa Dios para lang sa nanagbaton niini (Lukas 8:9-10). Dili lang nato basahon ang pulong sa Dios kondili ato usab kining “pamalandungan” aron ato kining masabtan (Salmo 1:2; 2 Timoteo 2:7).
- ii. Midawat sa Pulong sa Dios (Marcos 4:20)

- Dili lang sad igo nga atong sabton ang pulong sa Dios apan kinhanglan ato usab kining tuohan nga mensahe gikan sa atong buhi nga Dios. Ang kadaghanan wala makasinati sa Dios tungod kay wala silay pagtuo sa iyang pulong (Hebreo 4:2), apan kadtong mituo nakabaton ug tinuod nga kasinatian gikan kaniya (Hebreo 4:3)

iii. Nagkinabuhi sa Pulong sa Dios (Lukas 8:15)

- Dili lang sab igo nga atong masabtan ug dawaton ang Pulong, kondili labaw sa tanan ato kining “ikinabuhi.” Gitawag kita pagbuhat unsay atong nadunggan (Santiago 1:22).

iv. Nagpadayon pagkinabuhi sa Pulong sa Dios (Lukas 8:15)

- Dili lang sab igo nga nagkinabuhi kita karon sa pulong sa Dios unya ugma wala na. ang atong kalamposan wala mag-agad sa atong pagsugod kondili sa atong paglahutay ug paghuman.

PAG-APLIKAR NGA MGA PANGUTANA:

- Asa kita sa upat ka klase nga yuta?
- Aduna bay sampinit nga nagtuok sa pulong sa Dios nganhi sa atong mga kinabuhi?
- Sa unsang paagi nga imong mailhan nga dili buo (adunay mga bato) ang kasingkasing sa usa ka magtutuo?

PAGLUTOS

(Victorious Life Series Lesson 2)

“Bulahan kamo kon gipakaulawan kamo tungod sa inyong pagsunod kang Kristo...”

1 Pedro 4:14a

KINSA ANG MOAGI UG MGA PAGLUTOS?

1. Kadtong nagkinabuhi nga diosnon dinha ni Kristo Jesus.

"Ang tanan nga nagtinguha sa pagkinabuhi nga diosnon diha kang Kristo Jesus lutoson gayod

2 Timothy 3:12

✚ Ang nahigugma pa sa kalibotan nga mga Kristohanon higugmaon usab sa kalibotan apan ang nagkinabuhi gyud nga diosnon dinha ni Kristo pagalutoson gayod (Juan 15: 18-19)

2. Ang mga nagkinabuhi sa pulong sa Dios

“...pagabot sa mga kalisdanan ug mga paglutos tungod sa mensahe...”

Matthew 13:21

3. Kadtong naglakaw uban sa Espiritu sa Dios.

Bulahan kamo kon gipakaulawan kamo tungod sa inyong pagsunod kang Kristo; kini nagpasabot lamang nga ang mahimayaong Espiritu, ang Espiritu sa Dios, anaa kaninyo.”

1 Pedro 4:14

TANAN BANG KRISTOHANON ANG MOAGI UG PAGLUTOS?

“Hinumdomi ang akong gingon kaninyo: “Walay ulipon nga labaw sa iyang agalon; Kon gilutos nila ako, lutoson usab kamo nila...”

Juan 15 20a

✚ Nagingon ang atong Ginoo nga kung sya gilutos, kita usab pagalutoson gayod. Si apostol Pablo nagsulti usab nga ang tanang tinuod nga Kristohanon ‘moagi gyud ug mga paglutos’ sa mga tawo nga wala pa diha ni Kristo (2 Timoteo 3:12; 1 Tesalonica 3:4).

NGANONG ANAA MAY MGA PAGLUTOS?

1. **Tungod kay anaa kitay espirituhanon nga kaaway** (Gipadayag 2:10). Sa makadaghan mogamit ang Yawa ug mga tawo nga molutos kanato aron malayo kita sa Ginoo.
2. **Tungod kay ang mga panghunahuna sa mga tawo nga wala pa dinha ni Kristo sayop.** (Juan 15 18-21). Ang sakto ilang ginatawag niga sayop. Ang sayop, tama sa ilang mga

hunahuna. Wala pa sila makabaton ug panghunahuna sa Dios (1 Corinto 216).

UNSAY TAWAG NI JESUS SA MGA GILUTOS TUNGOD KANIYA?

"Bulahan kamo" kon bugalbugalan ug daogdaogon sa mga tawo, ug butangbutangan sa tanang matang sa kadaotan tungod kanako. Paglipay ug pagmaya kamo, kay dako ang ganti nga gitagana kaninyo didto sa langit.

Mateo 5 11-12a

- Gitawag nya kini ug **"bulahan"**.

UNSAY MGA NAGKALAINLAING PAGLUTOS NGA PUWEDE NATO MAHIAGOMAN?

- Pagbugalbugal (Mateo 5:11), pagsaway (1 Pedro 3:16), pagbutangbutang (Mateo 5:11), pagsalikway gikan sa mga hinigugma (Mateo 10:35-36), pagdagmal (Buhat 8:3), ug pagpatay (Mateo 24:0) ang pawede mahiagoman sa mga sumosunod ni Jesus.

UNSAY ATONG BUHATON KUNG LUTOSON KITA?

1. Sabta nga kabahin kini sa imong pagsunod kang Kristo

- "Walay tinun-an nga labaw sa iyang magtutudio, ug walay ulipon nga labaw sa iyang agalon. Busa angay'ng malipay ang tinun-an kon mahisama siya sa iyang magtutudio, ug ang ulipon mahisama sa iyang agalon. Kon ang pangulo sa

panimalay ginganlag Beelsebul, unsa pa kaha kangil-ad ang ihingalan sa iyang mga sakop!"

Mateo 10:24-25

2. Bantayi nga dili ka magbaton ug pagdumot hinuon, gugma kanila.

"Apan sutihan ko kamo higugrnaa ang inyong mga kaaway..."

Mateo 5:44a

3. Panalangini, i-ampo, ug buhati sila ug maayo.

"Panalangin ang manghimaraot kaninyo ug pag-ampo kamo alang sa nagdaogdaog kaninyo."

Lukas 6.28

"Kon buhatan kag daotan, ayaw baslig daotan. Buhata ang giila sa tanan nga maayo. Hinunoo, sumala sa gingon sa Kasulatan: 'Kon gutomon ang imong kaaway, pakan-a siya, kon giuhaw, paimna kay sa paghimo mo nini, maulaw sya sa iyang gibuhat kanimo.' Ayaw padaog sa daotan; hinunoo, dag-a ang daotan pinaagi sa maayo.

Roma 12:17, 20-21

4. Paglipay kay nakaambit ka sa mga pag-antos ni Kristo

"Hinunoo paglipay nga nakaambit kamo sa mga pag-antos ni Kristo, aron kamo magmalipayon ini padayag nasa iyang himaya. Bulahan kamo kon gipakaulawan kamo tungod sa inyong pagsunod kang Kristo..."

1 Pedro 4 13-14a

PAGHATAG UG PASAYLO

(Victorious Life Series Lesson 3)

PAG-APLIKAR NGA MGA PANGUTANA:

- Nakaagi na ba kita ug pagluto tungod sa atong pagsunod sa Ginoo?
- Kung wala pa, andam na ba kita moatubang kung moabot kini?

Maghisgot kita karon ug pagpasaylo sa uban. Adunay mga tawo nga gamiton sa Yawa aron kita masamaran ug makasala pinaagi sa pagdumot (Luas 17:1). Dili gyud kita motubo dinha sa Gino0 kung dili kita kahibalo mopasaylo sa uban. Ang atong Ginoo nagtudlo nga parte sa atong pag-ampo man ang pagpasaylo sa mga nakasala kanato (Mateo 6: 12).

MGA TIMAILHAN SA TAWONGA ADUNAY PAGDUMOT SA UBAN:

1. Dili ka gusto nga mahisgutan ug makauban kanang tawhana.

- Kung nasamaran ka sa usa ka tawo dili ka gusto makigkauban nianang tawhana. Kung mahisgutan ang iyang pangalan adunay kalagot nga imong mabati sulod sa imong kasingkasing. Kung imo siyang matagbo di ka gusto nga motagad o moatubang kaniya.

2. Dili nimo makita ang maayo nga parte niana nge tawo kondili ang mga sayop lang.

- Tungod kay aduna kay kasilo, dili nimo makita ang mga maayo (positive) nianang tawhana kondili ang mga sayop lang (negative). Ang mga gagmay'ng mali niya dako na kaayo sa imong panan-aw. Usahay gani puro nalang daotan ang mong makita kaniya.

3. Dili nimo mapugngan ang pagbalikbalik sa mga dili maayong butang nga iyang nahimo.

- Kung aduna ka pay kasilo sa usa ka tawo di nimo mapugngan ang pagbalikbalik sa yang nahimo kanimo. Dili nimo malimtan ang iyang nabuhat kanimo ug usahay kanunay kini magbalikbalk sa imong hunahuna.

4. Gusto ka manimalos nianang tawhana.

- Ang imong dili pagpasaylo sa nakasala kanimo mahimong pagdumot, ug kining pagdumot mobunga ug tinguha nga manimalos kaniya. Gusto nimo nga masakitan usab siya. Mangita kana ug higayon nga makabalos kaniya.

5. Dill nimo mapugngan ang pagdaot sa tawo diha sa iyang likod.

- Usahay bisag wala mahisguti ang iyang pangalan imo kining hisgutan uban sa Iyang gihimo kanimo. Dili nimo mapugngan ang pagsaway ug pagdaot sa iyang pagkatawo. Gusto nimo nga ang imong mga higala molaban karimo ug magdumot usab niadtong tawhana.

6. Malipay ka kung adunay dill maayo nga mahitabo nianang tawhana.

- Naglaom ug naghandom ka nga adunay daotang mahitabo kaniya ug kung kini mahitabo gayod malipay ka. Nagtuo ka nga ang Dios milaban kanimo pinaagi sa pagsilot kaniya.

7. Sa imong pag-ampo kanunay siya mobalik sa imong hunahuna

- Tungod kay aduna kay tawo nga wala pa napasaylo, ang Ginoo mopahinumdom kanimo nina panahon sa imong pakig-istorya kaniya. Usahay ipakita sa Dios ang Iyang nawong sa imong hunahuna Gbuhat kini sa Ginoo aron imo siyang pasayloon.

NGANONG MOHATAG MAN KITA UG PASAYLO SA UBAN?

1) Kay nakadawat man ta ug kapasayloan dina kang Kristo.

- Tungod kay nakadawat kita ug kapasayloan gikan sa Dios dinha ni Kristo, kita usab mopasaylo sa uban (Efeso 4:32).

2) Dili sila maoy tinuod nato nga mga kaaway.

- Ang mga tawo nga nagbuhat ug daotan nganhi kanato wala makahibalo unsay ilang ginabuhat (Lukas 23:34). Nabutahan sila sa mga daotang espiritu nga mao gyud ang tinuod natong mga kaonay (Efeso 6:12).

3) Aron makabaton kita ug kalinaw sa kalag.

- Nag-ingon si Ginoong Jesus nga paantoson sa Dios nga Amahan ang mga tawo nga dili kabalo mopasaylo sa uban sa kinasingkasing gayod (Mateo 18:34-35).

4) Aron pasaylo-on usab kita sa Dios.

- Klaro kaayo ang Biblia nga kung dili kita mopasaylo sa uban ang Dios dili usab mopasaylo kanato (Maleo 6:14-15, Marcos 11: 25).

5) Aron ang kaaway walay gunit kanato.

- Ang kasilo ug pagdumot sa atong mga kasingkasing maoy gunit o lugar diin ang panulay maka-panghilabot kanato (Efeso 4:26-27). Sala ang dili pagpasaylo, ug hain gani ang sala makapanghilabot ang Yawa

6) Aron ang atong mga pag-ampo dili mabalda.

- Ang bersikulo sa (1 Pedro 3:7) nagsulti nga kung adunay panagbingkil ang mag-asawa adunay babag sa ilang mga pag-ampo. Klaro kaayo nga ang kasilo ug dili pagpasaylo makababag sa atong mga pag-ampo ngadto sa Dios (Mateo 5 23-24). Mao kini ang rason nganong daghan sa atong mga gipangayo sa Ginoo wala natubag.

7) Aron makahatag kita ug kaayohan ug kinabuhi sa uban.

- Ang samaran nga tawo magasamad usab sa uban. Mora siya ug pait nga tanom nga nagahatag ug hilo ngadto sa uban (Hebreo 12 15). Pero ang tawo nga nakadawat na ug kaayohan sa iyang mga samad (pinaagi sa pagpasaylo) makahatag na usab ug kaayohan ug kinabuhi sa uban. Unsay atong nadawat Gikan sa Ginoo atong mahatag sa ubang tawo (Mateo 10 8).

ARON KA MAKAPASAYLO...

- Kinahanglan imo sang dawaton ang kapasayloan gikan sa Dios dinha ni Kristo (Efeso 4 32).
- Kinahanglan ka modesisyon paghatag ug pasaylo (Lukas 17:4. Mateo 18:21-22).
- Kinahanglan ka mohatag ug panalangin sa nakapasakit kanimo hangtod imong masinati ang kagaan sa imong sulod (Lukas 6:26-27).

PAG-APLIKAR NGA MGA PANGUTANA:

- ❖ Aduna bay tawo o mga tawo nga hangtod karon wala pa nimo napasaylo? Kung aduna andam ka bang mopasaylo?
- ❖ Kinahanglan pa ba kita maghulat ug maayo nga pagbati una mopasaylo? O mopasaylo na kita aron mawala ang dili maayo nga pagbati? Nag-agad ba ang pagpasaylo sa pagbati o sa kabubut-on?

ANG PRESENSIYA SA DIOS (1)

(Victorious Life Series: Lesson 4)

ANG DOIS ADUNAY KATUYOAN SA TAWO

Una naghimo ang Dios ug tawo anaa na sa iyang katuyoan niini. Ang Dios, Dios sa plano ug katuyoan. Dili siya mobuhat ug butang o bisan unsa kung wala siya'y katuyoan niini. Ang tanang binuhat adunay pulos niining kalibotana. Labaw na ang tawo nga binuhat sa panagway sa Dios (Genesis 1:26) ug maoy pinakataas sa tanan niyang binuhat.

PAGPAMUNGA ANG KATUYOAN SA DIOS NGADTO SA TAWO

Ang katuyoan sa Dios nga ang tawo magmauswagon (Jeremias 29:11) ug magmabungahon sa tanang aspeto sa iyang kinabuhi (Juan 15:*). Magmauswagon sa iyang relasyon sa Dios ug sa iyang relasyon sa iyang isig ka tawo. Magmauswagon sa espirituhanon, panglawas ug panalapi nga bahin (3Juan 2). Magmauswagon sa tanan niyang ginabuhat (Deuteronomio 28:12). Gusto sa Dios nga ang iyang pinakanindot ug pinakamaayo nga binuhat magpuyo nga malampuuson ug madaogon sa tanang higayon. Panalanginan ug pagkamadagayaon ang gusto sa Dios nga pagalakwan sa tawo (Deuteronomio 28:3-13); Juan 10:10, Filipos 4:19).

ANG MGAPRINSIPYO SA DIOS

Ang katumanan sa katuyoan sa Dios ngadto sa tawo nagdepende sa pagkamatinumanon sa tawo ngadto sa mga prinsipyo sa Dios

(Deuteronomio 28:1-2). Ang biblia puno sa mga prinsipyo sa Dios. Usahay ang mga pulong nga gigamit hulip sa *“prinsipyo”* mao ang mga pulong *“balaod”*, *“mando”*, *“pulong sa Dios”*, *“pamaagi sa Dios”* ug uban pa.

MGA KINAIYAAN SA PRINSIPYO

- i. Ang prinsipyo dili mausab
- ii. Ang prinsipyo motrabaho bisan asa.
- iii. Ang prinsipyo nagapanalipod sa produkto. Kung supakon nagahatag kini ug kadaot.

ANG PRINSIPYO SA KAHIMTANG (PRINCIPLE OF ENVIRONMENT)

Usa sa mga prinsipyo sa Dios mao ang *“prinsipyo sa kahimtang.”* Una mobuhat ang Dios ug us aka butang iya using gina-andam ang kahimtang (environment). Una niya gibuhat ang mga tanom ug mga kahoy iya sa using gibuhat ang yuta (Genesis 1:9-12). Una niya gibuhat ang mga isada ug mga mananap sa tubig iya usang gibuhat pag-una ang tubig (Genesis 1:20-21). Una niya gibuhat ang adlaw, bulan gibuhat usa niya pag-uan ang kawanangan ug gisiparar ang kahayag ug kangitngit (Genesis 1:14-19).

Ang kahimtang (environment) importante kayo iyang mga binuhat. ***Kung wala ang kahimtang ang iyang mga binuhat dili makabuhat sa katuyoan diin iya kining gibuhat.*** Ang mga nagkalainlaing binuhat adunay mga nagkalainlaing kahimtangan nga sibo gayod kaniya. Ang isda para gyud sa tubig, ang tanom para gyud sa yuta, ang bulan (moon) para gyud sa gabii, ang adlaw (sun) para gyud sa adlaw (day), u gang mga bituon para gyud sa kalangitan (sky).

ANG KAHIMTANG PARA SA TAWO (Right Environment for Man)

Ang tawo aduna usay *kahimtangan* nga para lang gyud kaniya. Ang tanaman sas Eden ang lugar nga giandam sa Dios para sa tawo. Dinhi niya gibutang ang tawo human niya kini gibuhat (Genesis 2:15). Ang “tanaman sa Eden” gitawag sa Bibilia ug “tanaman sa Dios” (Isaias 51:3; Ezequiel 28:13).

Mao kini ang lugar sa yuta diin ang Dios sa langit kanunay nagapundo. Ang pulong “Eden” sa Hebrohanon nga pinulongan “*eyden*” nga ang kahulogan “*kalipay*” (delight). Tanaman kini diin ang Dios nagalipay. Nagakalipay uban sa iyang painakapaboretong binuhat nga mao ang tawo. Dinhi siya perme nagapundo aron makiglakaw sa iyang pinalanggang binuhat (Genesis 3:8). Ang presensiya sa Dios ang nagakuyanap sa tanaman sa Eden. Mao kini ang kahimtangan (environment) sa tawo : “**Presensiya sa Dios**”.

ANG PRESENSIYA SA DIOS MAOY PINAKA-GIKINAHANGLAN SA TAWO

■ Ang tawo para sa presensiya sa Dios. Mao kini ang pinakakinahanglan sa tawo. **Kung wala ang tawo sa presensiya sa Dios patay siya bisan buhi.** Ang presensiya sa Dios sa atong kinabuhi maoy naghatag kanato ug kalipay, kalinaw, ug katagbawan (Salmo 16:11). Ang presensiya sa Dios maoy nakalahi kanato gikan sa mga tawo niining kalibotana (Exodo 33: 15:-16). Mao nga si haring David nangayo ug usa lang ka butang sa Dios, “**Nga magpuyo siya sa presensiya sa Dios sa tibuok niyang kinabuhi**” (Salmo 2:7).

■ Una gihatag sa Dios kang Adam si Eba iya using gihatag ang iyang kaugalingon sa tawo. Dili tawo ang pinakakinahanglan sa tawo kondili ang presensiya sa Dios! (Genesis 2:7).

■ Ang presensiya sa Dios maoy “kahimtang” nga gikinihanglan sa tawo aron ang mga katuyoan sa Dios matuman. Ang presensiya sa Dios nganhi sa atong kinabuhi maoy yawe sa atong pag-uswag ug pagpamunga (2 Samuel 6:10-11; Roma 8:31).

UNSAON NATO PARA KANUNAY KITA MAKAPUYO SA PRESENSIYA SA DIOS (Upat ka butang ang gikinahanglan)

1. Sakto nga Kasingkasing (Right heart)

■ Gikinahanglan nato nga ang matinumanon ug putli nga kasingkasing aron magpabilin kita sa buhi nga presensiya sa Dios. (Genesis 2:17, 3:23-24; Roma 3:23; Salmo 24:3-4; Salmo 51:10-11; Mateo 5-8).

2. Sakto nga mga tawo (Right people)

■ Adunay mga tawo nga giandam sa Dios aron atong makauban ug mahimong kaabag sa pagkinabuhi niining kalibotana. Adunay usay mga tawo nga makadala kanato palayo sa presensiya sa Dios. Gimandoan kita nga dili makigyugo uban kanila (1 Corinto 5:9-13; 2 corinto 6:14-15; 1 Corinto 15:33).

3. Sakto nga lugar (Right Place)

■ Adunay mga lugar diin giandam sa Dios para kanato. Dili tanang lugar niining kalibotanan ang puwede lang nato adtoan. Si Jonas nahiagom sa daghang kalisdanan tungod

kay gusto siya moadto sa us aka lugar nga wala giplano sa Dios para kaniya (Jonas 1:1-4). Adunay panahon nga si Apostol Pablo ug iyang grupo kaduha gibadlong sa Espiritu nga dili moadto sa mga lugar nga wala giandam sad IOS para kanila, hinuon gigiyahan sila sa saktong lugar pinaagi sa us aka panan-awon (Buhat 16:6-10).

4. Sakto nga Trabaho (Right Work)

- Kung gusto nato ang buhi nga presensiya sa Dios motrabaho kita uban kaniya. Ang iyang saad nga mag-uban kanato hangtod sa kahangtoran nagdependi sa atong pagtuman sa iyang mando paghimo ug mga disipolo (Mateo 28:19-20). Kinahanglan ang atong mga panan-awon ug ginabuhat sentro sa iyang gusto mahitabo dinhi sa kalibotan.

PAG-APLIKAR SA KAUGALINGON:

- ❖ Unsaon nato pagkahibalo nga puno kita sa presensiya sa Dios?
- ❖ Unsay makawala sa buhi nga presensiya sa Dios sa atong kinabuhu? (isulti ang imong kasinatian).

ANG PRESENSIYA SA DIOS (2)

(Victorious Life Series: Lesson 5)

Duha ka Butang Mahitungod sa Presensiya sa Dios:

1. ANG BISAN ASA NGA PRESENSIYA SA DIOS (Omni Presence of God)

“Asa ba ako paingon aron mahilayo ako sa imong Espiritu? Asa ba ako motago aron mahilayo sa imong presensiya? Kon mosaka ako sa langit, atua ka didto; kon mohigda ako didto sa kalibotan sa mga patay, atua ka usab didto.”

Salmo 139:7-8

- Naghisgot kini sa kadako sa Ginoo. Usa kini ka pagpadayag sa atong pagtuo nga siya ‘anaa sa tanang lugar sa tanang panahon.’ Kasagaran kini nga pagtuo nagagikan sa atong mga hunahuna tungod sa atong nabasa sa Biblia ug sa atong nakita sa palibot. Mao kini ang pag-ila nga ang Dios milukop sa tibuok kalibotan ug sa tibuok uniberso.

2. ANG BUHI UG MASINATI NGA PRESENSIYA SA DIOS (Manifest Presence of God)

“Gibati ko kanunay ang pag-uban sa GINOO; wala akoy gikahadlok, anaa man siya sa akong duol....ang imong presensiya naghatag kanakog tumang kalipay...”

Salmo 16:8;11

- Daghan kaayo ang makita nato sa Biblia diin ang buhi nga Dios nagpadayag sa iyang kaugalingon ngadto sa iyang katawhan. Ang Ginoo nagpadayag sa iyang buhi nga presensiya – ngadto kang Adan ug kang Eva, ngadto kang Abraham, kang Moises, sa mga Israelita sa mga propeta....sa adlaw sa Pentecostes, ug ang pagkakabig ni Saulo—paghisgot lang sa pipila. **Ang tibuok Biblia nagdeklara sa “Buhi nga Dios” taliwala sa iyang katawhan. Sugod sa sinugdan ngadto sa kataposan, ang pulong sa Dios nagahisgot mahitungod sa pagpadayag sa Buhi nga Dios ngadto sa tawo.** Kung atong kuhaon ang tanang libro sa Biblia nga naghisgot sa pagpakigtagbo sa Dios ngadto sa iyang katawhan ang mahibilin kanato mao nalang ang libro sa Ester, Panultihon ug ang libro sa Filemon. Wala gayod kitay Biblia kung ang Dios wala magpadayag sa tawo.
- Ang pagsinati sa tinuod nga presensiya sa Diyos maoy sentro sa tinuod nga pagtuo. Mao kini ang nakalahi kanato sa ubang mga relihiyon niining kalibotana. Dili lang tinuohan sa hunahuna kondili personal nga kasinatian ug relasyon sa Buhi nga Dios.

ANG BUHI NGA PRESENSIYA SA DIYOS:

i. MAKA-USAB KANATO

“Ang Ginoo” niining pahayaga mao ang Espiritu , ug hain gani ang Espiritu sa Ginoo, anaay kagawasan...ang maong himaya nga naggikan sa Ginoo nga mao ang Espiritu, mag-usab kanato ngadto sa iya gayong dagway sa labi pang dako nga himaya.”

2 Corinto 3:17-18

- Dili kita mabag-o sa pagtuo lang nga anaa ang Dios kanato ug nagauban kanunay. Mabag-o kita kung atong masinatian ang iyang buhi nga presensiya, sama sa nahitabo kang Saulo nga nahimong Apostol Pablo (Buhat 9:3-6). Ang akong pagtuo kinahanglan mapondar diha sa gahom sa Dios ug dili sa kaalam sa tawo (1 Corinto 2:4-5).

ii. MAKADANI SA MGA TAWO NGA ANAA SA KANGITNGIT

“Bangon ug sidlak kay miabot na ang imong kahayag, ug ang himaya sa Ginoo, misidlak na kanimo. Tabonan sa kangitngit ang kalibotan; ang katawhan tikyopan sa kangi-ob; apan ang Ginoo mosidlak kanimo, ug makita diha kanimo ang iyang himaya. Ang kanasoran moduol sa imong kahayag, ug ang mga hari moduol sa lamdag sa imong kahayag. Tan-awa ang imong palibot; Makita mo nga nagtigom na sila ug muduol kanimo...”

Isaias 60:1-4a

- Dili ang atong katakos ug kaalam moy makadala sa mga makasasala ngadto sa Dios, kondili Siya mismo. Ang buhi nga presensiya sa Dios nganhi sa atong kinabuhi maoy kahayag nga magadani sa mga tawo nga anaa pa sa kangitngit. Bisan asa kita moadto dala-dala nato ang kahayag, ang iyang “buhi nga presensiya.”

iii. MAOY MAGDALA SA MGA MILAGRO

“Sa Paghatag sa Dios kaninyo sa Espiritu ug sa pagbuhat niya sa mga milagro diha kaninyo...”

Galacia 3:5

- Kung ang buhi nga presensiya sa Dios nagaputos kanato ang mga katingalahang butang dali kaayo mahitabo (Buhat 6:8). Sama kang Pedro nga bisan ang maagian sa iyang anino nga maysakit mamaayo (Buhat 5:15). **Ang ‘paglakaw sa mga milagro’ mahitabo lang kung aduna kitay makanunayon nga kasinatian ug relasyon sa Dios.** Ang kadaghanang Kristohanon puno kaayo sa pulong sa Dios pero walay buhi ug lalom nga relasyon sa Dios. Pakigsuod sa Dios ug ang iyang gahom ug mga milagro magauban kanimo.

Ang Buhi nga Presensiya sa Dios Kinahanglan Kanunay Pangitaon

“Pangitaa ninyo ang Ginoo samtang siya hikaplagaan pa, sangpita ninyo siya, samtang siya duol pa...”

Isaias 55:6

“Pangitaa ninyo siya ug ang iyang gahom; tinguhaa kanunay ang iyang presensiya!”

1 Cronicas 16:11

- Kung gusto nato nga masinati ang Buhi nga Presensiya sa Dios kinahanglan ato siyang pangitaon. Sama sa lagsaw nga kinahanglan mangita ug muduol sa bugnaw nga sapa aron makainom (Salmo 42:10), kita usab muduol kaniya aron makainom sa buhi nga tubig sa Espiritu (Juan 7:37-39; 1 Corinto 12:13). Dili lang matag-domingo kondili sa matag adlaw ug sa matag gutlo aron masininaan kita kanunay sa iyang himaya ug gahom.

PAG-APLIKAR SA KAUGALINGON:

- ❖ Asa nabasi ang imong pagtuo? Sa imong hunahuna o sa imong kasinatian sa Buhi nga Dios?
- ❖ Nganong kinahanglan kita ug kasinatian sa Dios?

PAGPUASA

(Victorious Life Series: Lesson 6)

Usa sa pinaka-importante nga pagtulon-an sa Biblia mao ang “pagpuasa.” Dili kini ilado nga pagtulon-an sa daghang mga kasimbahanan tungod kay daghan ang wala nagabuhat niini lakip na ang daghang mga alagad sa Dios. Apan kon tan-awon nato ang Biblia (gikan sa Karaang Tugon ngadto sa Bag-ong Tugon) puno kini sa mga tawo sa Dios nga nagpuasa. Si Moises, Elias, Esdras, Nehemias, Ester, Hanah, David, Daniel, Anna, Juan nga Magbubunyag, Pablo ug daghan pang uban ang Makita nato nga nagpuasa sa ilang kapanahonan. Mismo si Jesus nga atong Ginoo sa iyang pagpakatawo dinhi sa yuta nagpuasa ug 40 ka adlaw ug 40 ka gabii

(Mateo 4:2).

MGA PAGTULON-AN NI JESUS MAHITUNGOD SA PAGPUASA

Sa Mateo 6:16-18 adunay tulo ka importante kayo nga pagtulon-an mahitungod sa pagpuasa nga gitudlo sa atong Ginoong Jesus:

1. Ang Pagpuasa Mando sa Dios

- Si Jesus miingon, “Ug sa inyong pagpuasa...” nagpasabot nga nagalaom siya nga kita magpuasa sama nga siya nagalaom nga kita “mohatag” (Mateo 6:2) ug “moampo” (Mateo 6:5). Sama nga ang ‘paghatag’ ug ang ‘pag-ampo’ mando sa Dios

mao usab ang ‘pagpuasa.’ Kinahanglan nga mahimong kaparte sa atong Kristohanon nga pagkinabuhi ang pagpuasa. Si Jesus miingon nga ang iyang mga tinun-an magpuasa samtang atua pa siya sa langit. (Mateo 9:14-15).

2. Ang Pagpuasa Buhaton Para sa Dios

- Si Jesus miingon nga kung kita magpuasa buhaton nato kini sa tago. Nagpasabot nga ato kining buhaton para sa Amahan sa langit ug dili para sa mga tawo dinhi sa yuta. Bantayan nato ang atong mga motibo kung kita magpuasa nga dili para “pakitang tao lang.” Ang uban nagpuasa aron ingnon nga sila kuyaw gyud nga mga Kristohanon.

3. Ang Pagpuasa Adunay Ganti sa Dios

- Sama nga ang paghatag ug ang pag-ampo adunay mga ganti mao usab ang pagpuasa. Si Jesus miingon nga ang atong Amahan sa langit maantigo moganti niadtong nagpuasa nga sakto ang motibo sa kasing-kasing . Ang Biblia nagsulti nga adunay mga butang sa Dios nga dili nato maangkon kung dili kita magpuasa, sama nga adunay mga butang nga dili nato mahuptan kung dili kita mohatag ug moampo. (Mateo 6:4; 6:6)

ADUNAY TULO KA KLASSE NG PAGPUASA

- Pagpuasa nga walay pagkaon kondili tubig lang (Normal Fast)
 - 2 Samuel 3:35; Mateo 4:2

- ii. Pagpuasa nga walay pagkaon ug walay tubig (Absolute Fast)
 - Exodo 34:28; Esdras 10:6; Ester 4:16
- iii. Adunay pagkaon pero dili mga lamian; puwede sad nga puro lang gulay (Partial Fast)
 - Daniel 1:12, 10:3

NGANONG KINAHANGLAN KITA MAGPUASA?

1. Para Madunggan sa Kahitas-an

- Adunay atong mga pag-ampo sa Dios nga dili madungog hangtod sa ato kining ubanan ug puasa. Adunay duha ka panghitabo sa Biblia nga atong pagahisgutan sa pagmatuod niini nga kamatuoran. Ang usa sa Karaang Tugon ug ang usa sa Bag-ong Tugon.
- i. **Maghuhukom 20:1-35** – Makita mo dinhi nga adunay panagsangka sa duha ka grupo. Ang mga Israelita batok sa banay ni Benjamin. Ang mga Israelita naa sa saktong rason aron sila makig-away sa mga taga-Benjamin. Ang purohan nga modaog ang mga Israelita batok sa banay ni Benjamin dako kayo tungod kay ang ilang gidaghanon 400,000 ka buok ug ang ilang kaaway 26,000 lang. Pero Makita nato nga sa unang panagsangka sila napildi ug namatyan ug 22,000 ka mga sundalo. Sa ikaduhang higayon sila napildi gihapon ug namatyan ug 18,000 ka buok sundalo. Sa ikatulong higayon sila na usab ang nagmadaogon batok sa ilang mga kaaway. Namatyan ug 25,100 ka buok sundalo ang banay sa

Benjamin. Unsay kalahian sa unang duha ka pakig-away nga sila napildi man ug sa ika-tulo nga pakig-away nga sila nagmadaogon man? Ang unang duha ka pakig-away miampo sila pero wala magpuasa, apan sa ika-tulo nga pakigsangka ang ilang mga pag-ampo giubanan ug pagpuasa (Maghuhukom 20:15-26). Ang pagpuasa maghatag kanato ug kadaogan!

- ii. **Marcos 9:14-29** – Adunay mga daotang espiritu nga dili mapahawa sa mga tinun-an ni Jesus ug sa dihang gidala kini nila sa Ginoo dali ra kini kaayo niyang gipahawa. Sa dihang wala nay mga tawo, miduol ang iyang mga tinun-an ug nangutana “Nganong wala man kami makapagula sa yawa?” Si Jesus mitubag, “Walay lain nga makapagula niining matanga sa espiritu gawas lamang sa pag-ampo ug pagpuasa” (Marcos 9:29; Mateo 17:21 KJV). Adunay mga daotang espiritu nga atong mahinagbo nga dili nato mabuntog hangtod ubanan nato ug pagpuasa ang atong mga pag-ampo.

2. Pagbungkag sa Sala ug mga Yugo sa Atong Kinabuhi

“Ang puasa nga akong gikinahanglan mao ang paglumpag sa mga gapos sa sala ug pagtangtang sa higot sa yugo, ingon man sa paghatag ug kagawasan sa mga dinaogdaog, ug pagbali sa tanang yugo.”

Isaias 58:6

- Adunay mga babag ug gapos sa atong kinabuhi nga dili matangtang hangtod dili kita magpuasa. Ang puasa usa ka hinagiban sa mga Kristohanon aron matangtang ang mga gunit sa yawa sa atong mga kinabuhi. Basaha usab ang Joel 2:12-14.

3. Para Dali Kita Makadungog sa Tingog sa dios

- Dali kaayo kita makadungog sa tingog sa Dios kung kita magpuasa. Mahimong sensitibo kaayo ang atong espiritu. Si Elias nakadungog ug giya sa Dios sa dihang siya nagpuasa (1 Hari 19:8-18), si Moises nakadawat sa napulo ka sugo sa dihang nagpuasa siya ug 40 ka adlaw ug 40 ka gabii (Exodo 34:28). Si Bernabe ug si Saulo nakadungog sa tawag sa Dios sa dihang sila nagsimba ug nagpuasa (Buhat 13:1-2).

PAG-APLIKAR NGA MGA PANGUTANA:

- ❖ Unsay mga nakatandog kanimo sa atong leksiyon?
- ❖ Andam ka na ba magpuasa? Pila ka adlaw? Kanus-a ka magsugod?

MADAOGON NGA KINABUHI

(Victorious Life Series: Lesson 7)

Sa mga sulat ni Jesus ngadto sa pito ka mga iglesia sa libro sa Gipadayag ginabalikbalik ang pulong "pagdaog", "modaog", ug "pagmadaogon" (Gipadayag 2:7, 11, 17, 26, 3:5, 12, 21). Pipila sa gisulti sa Ginoo dinhi mao nga, "*Ang **modaog** dili mahiagom sa ikaduhang kamatayon*" (Gipadayag 2:11). "*Alang sa **makadaog ug mopadayon** pagbuhat sa akong kabubut-on hangtod sa kataposan, hatagan ko silag gahom sa pagmando sa mga nasod*" (Gipadayag 2:26). "*Ang **modaog** bistihag puti sama niini, ug dili ko papason ang ilang ngalan sa libro sa mga buhi*" (Gipadayag 3:5). Ang langit para sa mga tawo nga madaogon. **Adunay tulo ka kaaway nga atong dag-on sa atong pagsunod sa Ginoo.**:

1. Ang atong "MAKASASALA NGA KINAIYA"

"Busa nasayran ko kining usa ka balaod nga sa higayon nga gusto akong magbuhat sa maayo, ang daotan hinuon ang akong mabuhat. Sa akong kasingkasing nakagusto ako sa balaod sa Dios, apan ania usab kanako ang usa ka kinaiya nga sukwahi sa balaod nga nagustohan ko, ug kini nag-ulipon kanako sa balaod sa sala nga ania sa akong lawas. Pagkaalaot ko gayod! Kinsa bay moluwas kanako gikan niining lawas nga nagyudyud kanako ngadto sa kamatayon? Salamat sa Dios pinaagi sa atong Ginoong Jesu-Kristo." (Roma 7:21-25a)

- Ang "tawhanong kinaiya" o "makasasala nga kinaiya" mao ang kinaiya nga ania kanato nga atong napanunod gikan sa pagpakasala ni Adan (Roma 5:12; 1 Pedro 1:18). Mao kini ang "hulog nga kinaiya" nga nagatukmod kanato sa pagpakasala.

Unsaon Pagdaog sa Makasasala nga Kinaiya?

Puy-i ang kadaogan nga anaa kang Jesu-Kristo, *"Pagka-alaot ko gayod! Kinsa bay moluwas kanako gikan niining lawas nga nagyudyud kanako ngadto sa kamatayon? Salamat sa Dios pinaagi sa atong Ginoong Jesu-Kristo"* (Roma 7:24-25a). Kung si Kristo ang himuon natong Ginoong dh na makadumala ang makasasala nga kinaiya nganhi kanato. Adunay kompleto nga kadaogan dinha kaniya!

Pagkinabuhi uban sa Balaang Espiritu. Sa dihang atong gitugyan ang atong kinabuhi ngadto kang Kristo mipuyo na nganhi kanato ang Espiritu Santo (Efeso 1:13-14). Busa gimandoan kita sa Dios nga maglakaw na pinaagi sa Espiritu Santo ug dili na sa tawhanong kinaiya (Galacia 5:16-17). Kung magpadayon kita pagkinabuhi sa 'makasasala nga kinaiya' moani kita ug kamatayon apan kung pinaagi sa gahom sa Espiritu ato kining patyon moani kita ug kinabuhi (Galacia 6:7-8, Roma 8:13). *"Karon dili na pakasad-on kadtong nahiusa kang Kristo Jesus. Kay **ang balaod sa Espiritu** nga naghatag ug kinabuhi pinaagi sa pagkahiusa kang Kristo Jesus nagluwas kanako gikan sa balaod sa sala ug sa kamatayon"* (Roma 8:1-2).

Puy-i ang Bag-o nga Kinaiya. Atong idumili ug patyon ang atong 'karaang kinaiya' kada-adlaw (Lukas 9:23) kay ang anaa ni Kristo nagalansang na sa ilang 'karaang kinaiya' (Galacia 2:20; 5:24). Dili lang ang atong mga sala ang gibayran ni Kristo didto sa Krus apan iya usang gibayran ang atong 'makasasala nga kinaiya' (Galacia 6:14). Atong dawaton ang iyang gibuhay didto sa krus ug puy-an ang "bag-o nga tawo" nga atong nadawat dinha ni Kristo (2 Corinto 5:17). Ang pagkaKristohanon dili lang "pagbag-o ug kinabuhi" (changed life) kondili "bag-o nga kinabuhi" (changed life) kondili "bag-o nga kinabuhi" (new life). *"Dili mahinungdanon kon ang usa ka tawo tinuli ba o dili. Ang mahinungdanon mao nga siya **bag-o nang binuhat**"* (Galacia 6:15).

2. Ang "PANULAY"

"Kay wala kita makig-away batok sa mga tawo, kondili batok sa mga daotang espirituhanong gahom diha sa kalangitan, sa mga hari, sa mga anaa sa gahom, ug sa pangulo niining kalibotana sa kangitngit"

Efeso 6:12

Tulo sa pinakakuyaw nga hinagiban sa atong kaaway:

- Pagtintal** (Mateo 4:1-10) - Ang tumong sa pagtintal mao ang pagpahilayo kanimo sa kabubut-on sa Dios pinaagi sa paglingla kanimo sa mga nindot ug maayo nga butang bugti sa imong pagsupil sa Dios.

II. **Pag-akosa** (Gipadayag 12:10) - Usa sa pangalan ni Satanas sa Biblia mao ang "Tig-akosa" (Accuser). Adunay upat ka paagi nga ang Yawa mo-akosa.

- a) **Pag-akosa sa imong kaugalingon** - Ang Panulay mopaulan sa imong hunahuna ug mga bakak mahitungod kanimo. Ang kaaway mobalikbalik sa imong mga sayop, mga sala, ug mga kaluyahon nga napasaylo na sa Ginoo aron ka maglagot sa imong kaugalingon ug madiskorahe (discourage).
- b) **Pag-akosa gikan sa uban** - Ang panulay mogamit usab ug mga tawo nga mo-akosa ug modaot kanimo.
- c) **Pag-akosa sa uban pinaagi kanimo** - Usahay kung dili ka makabantay mogamit usab ang panulay kanimo aron pag-akosa ug pagdaot sa uban.
- d) **Pag-akosa sa Dios** - Apan sa makadaghan ang iyang i-akosa mao ang Dios aron ang atong panan-aw ngadto sa Ginoo dili na maayo kondili daotan na.

III. **Pag-ilad** (1 Timoteo 4:1) - Mao kini ang atake sa kaaway pagdala kanimo ngadto sa pagtuo ug mga desisyon nga abi nimo ug sakto apan dili diay. Mao kini ang iyang gibuhay kang Eva (1 Timoteo 2:14). Puwede ka mailad sa panulay pinaagi sa sayop nga pagdesisyon, sayop nga pagtuo, sayop nga pagtulon-an, ug sa sayop nga panan-awon. Ang tawo nga nailad wala gyud nakahibalo nga siya anaa sa sayop.

Unsaon Pagbuntog sa Yawa?

"Pagbantay ug pagtukaw kamo kay ang inyong kaaway nga mao ang Yawa naglibotlibot kaninyo sama sa liyon nga nagngulob, nangita ug tukbonon. Lig-ona ang inyong pagtuo ug sukli siya."

1 Pedro 5:8-9a

"Busa pagmasinugtanon kamo sa Dios. Sukli ninyo ang Yawa ug modagan siya."

Santiago 4:7

■ Aron atong mabuntog ang mga pagtintal, pag-akosa, ug pag-ilad sa atong kaaway kinahanglan kita (1) **magbantay ug magtukaw dinha sa espiritu**, (2) **mosabmitar sa Dios**, ug (3) **mosukol uban sa pagtuo hangtod ang Yawa modagan**. Sa atong pagsukol sa panulay atong gamiton ang pangalan ni Jesus (Marcos 16:17) ug ang espada sa Espiritu nga mao ang Pulong sa Dios (Efeso 6:17; Mateo 4:1-10).

3. Ang "KALIBOTAN"

"Ayaw ninyo higugmaa ang kalibotan o bisag unsa nga iya sa kalibotan. Kon higugmaon ninyo ang kalibotan, wala kamo mahigugma sa Amahan. Kay ang tanang butang nga iya sa kaibotan—ang **kaulag**, ang tanang **gikaibgan sa mga mata**, ug ang tanang **gipasigarbo sa tawo**—walay bisan usa niini nga iya sa Amahan, kondili iya sa kalibotan."

1 Juan 2:15-16

- Ang kalibotan nga gipasabot dinhi dili ang pisikal nga kalibotan nga gibuhat sa Dios (Roma 8:22) o ang mga tawo sa kalibotan nga gihigugma sa Dios (Juan 3:16) kondili ang "*mga pamaagi ug sistema sa kalibotan nga supak sa Dios*." Sa itaas nga bersikulo makita nato ang tulo ka gipakabili sa kalibotan (worldly values):

- i. Kaulag sa Unod (Lust of the Flesh)** - Ang 'kaulag sa unod' mao ang pagpuyo sa mga kahilayan ug mga bisyo (2 Timoteo 3:4) aron pagtagbo sa makasasala nga kinaiya (sinful pleasures). Ang *pagpuyo sa kahilayan* nadawat na sa kadaghanan nga kung magpuyo ka nga 'balaan' ikaw na usahay ang mahimong daotan.
- ii. Kaibog sa Mata (Lust of the Eyes)** - Ang 'kaibog sa mata' mao ang pagkalulong sa mga materyal nga butang ug paghigugma sa salapi (materialism). Daghang mga tawo ang mipalabi sa mga materyal nga butang kay sa Dios. Ang salapi maoy ilang dios nga gialagaran ug gihigugma (Mateo 6:24; 1 Timoteo 6:10).
- iii. Garbo sa Kinabuhi (Pride of Life)** - Ang 'garbo sa kinabuhi' mao ang pagpuyo sa pagkamapahitas-on sa kaugalingon (boastfulness). Kining mga tawhana kanunay nagapaningkamot nga mailado ug mosikat atubangan sa kadaghanan. Kanunay sila manghinambog sa uban mahitungod sa ilang kaugalingon (identity), nabatonan (possessions), ug mga nahimo (accomplishments).

Unsaon Pagdaog sa espiritu sa Kalibotan?

- Ang Biblia nagsulti, "Ayaw kamo pagpahuyon niining kalibotana, kondili ipabag-o sa Dios ang inyong panghunahuna aron masayran ninyo ang kabubut-on sa Dios—unsay maayo, hingpit, ug makapahimuot kaniya" (Roma 12:2). Ang tinuod nga anaa sa Dios nagamatngon nga dili mahugawan sa kangil-ad sa ilang palibot, "Alang sa Dios nga Amahan, ang putli ug matuod nga tunuohan mao....ang pagmatngon nga dili kabulingan ang iyang kaugalingon sa kangil-ad sa kalibotan" (Santiago 1:27). Aron dili kita madala sa espiritu sa kalibotan kinahanglan magpapuno kita kanunay sa Espiritu sa Dios (Efeso 5:15-18) ug sa Pulong sa Dios (Salmo 119:11).

Ang tulo ka kaaway nahilambigit sa usag-usa

Sa tinuod, kining tulo ka kaaway nga atong gihisgotan nahilambigit sa usag-usa. Ang "Yawa" motintal kanato pinaagi sa "*sistema ug mga pamaagi sa kalibotan*" aron maglakaw kita sa "*makasasala nga kinaiya*."

Siguro na ang atong kadaogan dinha ni Kristo

Pero bisan pa ug unsa ka dagan ang atong kaaway kung ang Dios anaa kanato madaogon gihapon kita. *Didto sa krus napildi na ni Kristo ang tanang kaaway ug kita nga anaa kaniya kinahanglan magpuyo na niana nga kadaogan* (Colosas 2:15; 1 Corinto 15:57).

PAG-APLIKAR SA KAUGALINGON:

- ◆ Unsay mga ganti sa madaogon nga Kristohanon dinhi sa kalibotan?
- ◆ Nganong ang uban saka kanaog ang ilang espirituhanon nga kinabuhi?

LAKAW UG AYAW NA PAGPAKASALA (1)

(Victorious Life Series: Lesson 8)

"Si Jesus mituyhad ug miingon kaniya, "*Babaye, hain na man sila? Wala bay nagpabilin aron pagsilot kanimo?*" " '*Wala, sir*', siya mitubag. '*Kon mao kana,*' si Jesus miingon kaniya, '*dili usab ako mosilot kanimo. Lakaw ug ayaw na pagpakasala*' "

Juan 8:10-11

Human gipasaylo ni Jesus ang babaye nga nasakpan nga nanapaw miingon siya ngadto kaniya, "Lakaw ug ayaw na pagpakasala." Mao usab kini ang gusto sa Dios nganhi kanato human kita nakabaton ug kapasayloan ug kaluwasan. Maglakaw nga dili na magpakasala. Ang atong Amahan nagtawag kanato sa pagkabalaan tungod kay siya balaan (1 Pedro 1:15-16).

NAPULO KA RASON NGANONG DILI KITA MAGPAKASALA

#1 Ang sala dili makatagbaw

❑ Usahay isip magtutuo makalimot kita nga ang sala makahatag ug tinuod nga lingaw (pleasure). Usahay nindot kayo ang pamati kung magpakasala. Mao nga ang sala gamhanan ug makaanad kayo (addictive). Adunay mga "drug addict" nga nalingaw kaayo sa ilang mga ginagamit nga druga, ug mga "immoral" nga tawo nga giganahan kaayo sa ilang mga ginabuhay. Tinuod ang giingon sa Hebreo 11:25, nga, '*adunay masinati nga kalipay sa sala sulod sa*

mubo nga panahon'. Tinuod nga adunay lingaw sa sala apan dali lang kini kaayo. Walay malungtaron nga katagbawan sa sala!

- ❑ Human sa "high" sa droga, human sa kalipay sa "immoral" nga pakighilawas, human sa pagbuhat ug sala, "masinati nato ang kahaw-ang sa atong kalag". Bation nato ang kahugaw (filthy) ug ang bakanti (hollow). **Ang sala dili gyud makahatag ug tinuod nga katagbawan hinuon mohatag kini ug kauga (dryness) sa atong kinabuhi.** Sa kataposan ang kalipay mahimong kasub-anan, ang kagana mahimong kahadlok, ang lingaw mahimong gapos. Ang sala dili gyud mohatag sa iyang gisaad! Walay tinuod ug malungtaron nga kalipay sa sala.

#2 Ang sala modaia kanato ngadto sa uban pang mga sala

- ❑ Nag ingon ang Panultihon 5:22, "**Lit-ag ang mga sala sa tawong daotan, ug maunay siyag kalaang sa iyang kaugalingong sala.**" Kung magpakasala ka nagalit-ag ka sa imong kaugalingon. Nagtuo ang uban nga ang "makasasala" libre nga makabuhat unsay iyang gusto buhaton ug ang "kristohanon" ginapos sa mga patay nga balaod sa Biblia, baliktad ang tinuod. Ang makasasala naulipon sa sala ug ang anak sa Dios gawasnon nga mobuhay sa kabubut-on sa Dios (Juan 8:34-36). Kita nga anaa sa kahayag ang gawasnon dili ang mga tawo nga anaa sa kangitngit.
- ❑ Ang tintasyon (temptation) nagsulti nga, "pagpakasala aron ka matagbaw ug malipay". Dako kini nga bakak! Ang bunga lang niana nga pagpakasala mao ang '*dugang tinguha sa pagpakasala*' (desire to sin more). Ang sala mohatod sa dugang pagpakasala. Nag-ingon sa Ecclesiastes 5:10, "***Kon makisapi ka, dili ka gayod matagbaw niini...***" Gusto ka pa gyud ug dugang!

Ang kadalo dili gyud matagbaw ug bahandi; ang nalulong sa droga dili gyud matagbaw sa bisan unsa nga droga; ang kaulag dili gyud matakaw ug usa lang ka tawo; ang garbo dili gyud matagbaw ug mga pasidungog ug pagdayeg gikan sa uban.

- ❑ Ang uban una mihimo sa sala misaad nga, "*kausa lang gyud nako kini buhaon ug pagkahuman niini dili na gyud nako kini usbon.*" Apan ang sala kung imong tagaan ug binta bisan ug usa lang ka porgada (1 inch) mohatod kini kanimo ngadto sa usa ka kilometro (1 kilometer). Kung imong pasudlon ang usa ug gamay nga sala magdala kini ug daghan pa kaayong sala sa imong kinabuhi. Dali lang ang pagbuhat sa sala pero lisod kaayo ang paghawa. Mao kini ang usa ka rason nganong dili kita magdula sa sala.

#3 Ang sala modala kanato ngadto sa mas ngil-ad pa nga mga sala

- ❑ Kini nga prinsipyo makahadlok kaayo. "***Ang sala mohatod gayod sa kinaiya sa tawo ngadto sa kangil-ad; ang sala dili gyud mopataas kanato.***"
- ❑ Mao kini ang dagan sa sala; Ang sala dili gyud makatagbaw, mohatod kini sa uban pang mga sala, ug ang kadaghanan niini mas ngil-ad ug grabe pa nga mga sala. Ug sa sige ug pagpakasala nagkabagtok ang kasingkasing ug wala nay kaulaw (Efeso 4:17-19).
- ❑ Ang sala mohatod kanato sa grabe pa nga mga sala — mas ngil-ad, mas hugaw, ug mas makadaot. Talikdi na ang sala samtang sayo pa ug aduna pay panahon!

#4 Ang sala nagapaubos ug nagapabarat sa atong pagkatawo

- ❑ Ang sala nagamansa (stains) sa makasasala. Nag ingon ang Ecclesiastes 10:1, "**Ang patayng mga langaw makalang-og sa usa ka tibod nga agwa; ug ang diyotayng kabuang makadaot sa labing maalamon.**"
- ❑ Mipahimangno si Haring Soloman nga, "**...ang mananapaw walay maayong panabot. Gidaot laman niya ang iyang kaugalingon. Kulatahon siya ug kawad-ag dungog ug maulawan**" (Panultihon 6:32-33). Ang sala mopabarat sa atong pagkatawo. Ang Yawa gusto nga mawad-an kita ug dungog ug magpuyo sa kaulaw apan ang Dios gusto mosinina kanato sa iyang himaya (Juan 17:22).

#5 Ang sala nagakawat sa atong kalipay

- ❑ Ang kalipay nga gikan sa Ginoo nganhi sa atong kinabuhi importante kaayo. Mao kini ang atong kusog (Nehemias 8:10). Sa presensiya sa Dios adunay tinuod nga kalipay (Salmo 16:11). Ang malipayon nga kasingkasing maayo nga tambal apan ang guba nga espiritu nagahatag ug kadaot (Panultihon 17:22; 18:14). Makalahutay kita bisan unsa basta ang atong espiritu mayo apan kon kini *samaran, guba*, ug masulob-on, bisan ang nindot nga adlaw ngitngit ug ngil-ad kaayo.
- ❑ Ang sala nagatangtang sa 'kalipay' tungod kay kini makapalayo kanato sa buhi nga presensiya sa Dios. Ang sala nagakawat sa usa ka butang nga dili mabayran bisan pa ug tibuok bahandi kini sa kalibotan. **Ayaw ikambiyo ang kalipay sa Dios sa usa lang ka sala.**

PAG APLIKAR NGA PANGUTANA

- ◆ Paghatag ug tulo ka butang nga nakigsulti kanato ug ngano man?
- ◆ Motuo ba kita nga walay tinuod ug malungtaron nga kalipay sa sala? Ngano man?
- ◆ Unsay mga nagahawid pa kanato nga sala? Andam ba kita mosalikway ug motaikod niini?

LAKAW UG AYAW NA PAGPAKASALA (2)

(Victorious Life Series: Lesson 9)

Kinahanglan kombinsido kita nga makapuyo ug 100% nga balaan nga kinabuhi. Ang Dios dili mopabuhat kanato ug butang nga dili nato mahimo. Kung momando siya nga kita magbalaan puwede kita makabuhat niini. Niadtong imaging semana naghigot kita ug lima ka rason nganong dili kita magpakasala. Magpadayon kita paghigot ug lima pa karon.

#6 Ang bayad sa sala mao ang kamatayon

- Aduna lang gyuy us aka paagi diin ang sala matinumanon: **Ang iyang ganti kanunay gyud kamatayon** (Roma 6:23). Ang kadaot lang kay kini nga sekreto dili gyud isulti sa sala kanimo hinuon mosaad siya og kalipay, bahandi, dungog, katagbawan, ug gahom. Ug posible nga makasinati ka niini sa imong pagpakasala pero kini dill gyud malungtaron ug moabot gyud ang panahon sa tigsingil. Ang bunga pareha lang gyud gihapon: **kamatayon sa natural ug sa espirtual.**
- Ang sala nagadala gyud ug kamatayon nganhi kanato. Nagaguba kini sa atong pagkasensitibo sa Ginoo, nagadugmok sa atong konsensiya, ug nagadagmal sa atong kalag. **Matag buhat nato ug sala, adunay anaa kanato nga gakamatay. Unya sa unahan sa dalan, ang sala mobayad gyud ug kamatayon ---- kana nagpasabot ug pagkahilayo sa Dios, karon ug hangtod sa kahangtoran** (Santiago 1:15). Unsay atong itanom maoy atong anihon. Kung nagtanom

kita sa tawhanon nga pagpakasala moani kita ug kamatayon apan kung naglakaw kita sa Espiritu Santo moani kita ug kinabuhi (Galacia 6:7-8).

- **#7 Ang Dios nagasilot sa makasasala—niin nga kalibotan ug sa umaabot**
- Tinuod ang natural nga bunga sa sala kamatayon. Pero ang Dios aktibo usab nga nagasilot sa mga makasasala. **Ang Ginoo nagaputol kanila!** Silot ang iyang saad sa mga makasasala nga dili maghinulsol. Sa Karaan nga Tugon (Levitico 26.14-33) ug sa Bag-ong Tugon (Gipadayag 2:5, 16, 21-23, 33,15-16).
- Bisan pa ug ang tibuok kalibotan batok kanato basta ang Dios uban kanato wala gyud kitay kahadlok. Ang pinakakuyaw nga mahitabo sa usa ka binuhat mao nga ang iyang Magbubuhat moingon, **"Batok ako kanimol"** Mao kini ang buhaton sa Dios ngadto sa mga tawo nga magdumili pagpamunga (Isaias 1:18-20; 5:1-7; Lukas 3:9, 13:3, 6-9. Juan 15:2). Makalilisang gayod kaayo kung ang buhi nga Dios maoy mosilot kanato tungod kay nagpadayon pa kita sa pagpakasala (Basaha ang Hebreo 10:26-31).
- **#8 Ang sala nagapasakit sa Ginoo**
- Basin ang hulagway sa Dios nga nasuko wala kaayoy bili kanimo. Tungod kay luwas ka na ug imo na siyang gitan-aw nga imong mahigugmaong Amahan. Siya mao ang imong higala ug suod nga kauban. **Pero sabta nga sa matag buhat nimo ug sala imong ginaluwaan ang iyang nawong! Imong ginasamaran ang iyang kasingkasing.** Ang imong sala nagapasakit pag-ayo sa imong manluluwas. Siya ba gyud ang rason nganong ikaw nabuhi? Imo ba gyud siyang

hinigugma? Nganong sige ka man lagi ug pagpakasala? Nag-ingon ang atong Ginoo nga, *"Kon nahigugma kamo kanako, tumana ninyo ang akong mga sugo* (Juan 14:15).

- Sa dihang milimod si Pedro katulo nga, 'di niya kauban si Jesus, *"Milingi ang Ginoo ug mitutok kang Pedro, ug nahinumdom si Pedro sa gisulti sa Ginoo kaniya, Sa dili pa motuktugaok ang manok karong adlaw, limod mo na ako sa makatulo"* Migula si Pedro ug mihilak sa hilabihang pagbasol" (Lukas 22 61-62). Posible nga sa panahon nga makasala kita imbes molingiw, ang Ginoo motan-aw kanato? Unsay makita nimo sa iyang nawong? Kalipay, kasuko o kasubo?

#9 Ang sala nagapasakit sa makasasala

- Ang sala wala lang nagahatag ug sakit (pain) sa Dios kondii nagahatag usab kini ug sakit kanato nga nakasala. Makaguba kini sa atong adlaw, sa atong panglawas, sa pangita, sa atong trabaho, sa atong hunahuna... makasamok kini sa tanang butang. **Kung magpadayon kita sa pagpakasala atong ginaguba ang atong kaugalingon ug ang atong kaugmaon!**

#10 Ang sala nagapasakit sa pamilya ug mga higala sa makasasala

- Nasayod kita nga ang sala dili lang makaapekto sa nagbuhat ug sala. Ang mga tawo nga nahilambigit kaniya maapektohan usab. Ang makasasala nagdala ug samok sa iyang pamilya, mga higala, lokal mga iglesia, ug katilingban. **Ang sala moangin sa uban!**

UNSAON NATO PAGDAOG ANG SALA?

1. Bantayi ang imong kaugalingon nga dili makasala.

- Si Eba nahulog sa sala tungod kay mipaduol siya sa kahoy nga ginadili sa Dios. Naminaw ug nakigkukabildo usab siya sa tingog sa panulay (Genesis 3:1-6). Nahulog siya kay wala siya nag-amping. Ayaw paduol sa mga lugar nga posible ka matintal ilha ug banitayi ang imong mga "kaluyahon." Ang pinaka-epektibo nga hinagiban mao ang pagbantay ug ang paglikay.

2. Bag-oha ang imong karaang mga panghunahuna.

- Ang rason nganong dili makaundang ang kadaghanan sa "pagpakasala" tungod kay nagtuo sila nga, 'dili sila makaundang kay tawo lang sila.' Kini nga panghunahuna dili tinuod ug bakak. Ang kamatuoran mga "Bag-o na kitang binuhat dinha ni Kristo. Ang karaan milabay na (2 Corinto 5:17). Patay ka na sa sala ug buhi na sa Dios (Roma 6:11). Puwede ka na makaundang sa pagpakasala kay anak ka na sa Kahayag (1 Juan 3:9; Efeso 5:8).

3. Sukli ang tintasyon.

- Ang grasya sa Dios nga atong nadawat maoy mohatag kanato ug gahom diin makadumili batok sa sala (Tito 2:11-12). Balibari ang mga tintasyon pinaagi sa pagsulti ug **"DILI"** (No).

4. Daoga ang imong mga tinguha nga dili maayo.

- Dili motintal ang Dios kanato sa pagpakasala (Santiago 1:13), Matintal ang tawo tungod sa mga daotang tinguha nga anaa sulod kaniya (Santiago 1:14). Mawagtang kini nga mga tinguha pinaagi sa pagpapuno sa pulong sa Dios ug sa presensiya sa Dios (Salmo 119:11, Efeso 5:26: Efeso 5:18). Tugotan nato ang Ginoo nga moputli sa atong mga tinguha (Salmo 51:10).

PAG-APLIKAR NG MGA PANGUTANA:

- ❖ Sa napulo ka resulta sa pagpakasala unsay nakatandog kanimo? Ngano man?
- ❖ Nganong ang ubang Kristohanon dili makabalibad sa uban kung sila tintalon?
- ❖ Unsay mga tinguha nga anaa pa kanato nga dili lya sa Dios?
- ❖ Motuo ka ba nga puwede ka makapuyo ug balaan nga kinabuhi dinhi sa kalibotan uban sa Ginoo? Andam ka ba mokinabuhi niini nga pagtuo?

PUTLI NG KASINGKASING **(Discipleship Series: Lesson 10)**

"Ako ang GINOO, nag sa hunahuna ug nag-usisa sa kasingkasing sa tawo, Gantihan ko ang two sumala sa iyang binuhatan ug sa iyang pagkinabuhi.

Jeremias 17:10

ANG DIOS NAGATAN-AW SA KASINGKASING SA TAWO

Dili igo ang maayong binuhatan sa gawas kondili ang "motibo" luyo niana nga binuhatan. Ang Dios nagatan-aw sa atong kasingkasing sa panahon nga kita nagasimba (Mateo 15: 5-9), nag-ampo (Lukas 18:9-14), nagahatag (Lukas 21:1-4), nagapuasa (Mateo 6:16-18), ug sa tanan natong mga ginabuhat.

Nganong gusto kita mouswag sa panalapi nga bahin? Nganong gusto kita makabaton ug gahom sa Dios? Nganong gusto kita molambo sa atong pagpangalagad sa Dios? Nganong nagahatag kita sa trabaho sa Dios? Nganong nagatabang kita sa uban? Nganong nagasunod kita sa Ginoo?

SAKTO UG SAYOP NG MOTIBO

Ang sakto nga motibo nagasentro sa Dios (Colosas 3:23), ug ang sayop nga motibo nagasentro sa kaugalingon (Mateo 23:5-7). Importante nga ang tanan natong pagabuhaton para sa pagpataas

sa Dios ug dili sa atong kaugalingon. Ang atong lipayon dili ang mga tawo kondili ang Ginoo (Galacia 1:10).

KUNG ANG ATONG KASINGKASING SAKTO...

1. Ang Dios magapataas kanato

"Pagpaubos kamo sa atubangan sa Ginoo, ug bayawon kamo niya" (Santiago 4:10). Si David maoy gipili sa Dios nga mopull kang Haring Saul isip hari sa Israel tungod kay maayo ang iyang kasingkasing (1 Samuel 16:7, 12-13; Salmo 45:7). Sa laing bahin, gipulihan sa Dios si Haring Saul tungod kay dili na sakto ang iyang kasingkasing (1 Samuel 15/26).

2. Ang Dios magauswag kanato

"Bulahan ang tawo nga may pagtahod sa GINOO, ug malipay nga motuman sa iyang sugo. Mahimong gamhanan ang iyang mga anak; mabulahan ang kaliwat sa maayong tawa. Madato ang iyang pamilya, ug mauswagon siya hangtod sa kahangtoran.

Salmo 112:1-3

3. Ang Dios magapanalipod kanato

"Tabangan ug panalipdan niya ang mga matarong ingon man ang mga makiangayon ug kadtong nagmatinumanon kaniya."

Panultihon 2:7-8

4. Ang Dios atong makita ug masinati

"Bulahan ang putli ug kasingkasing, kay makakita sila sa Dios!" (Mateo 5:8). Kung putli ang atong kasingkasing atong masinati ang buhi nga presensiya sa Dios (Salmo 24:3-4).

UNSAON PAG-ILA SA IMONG KASINGKASING

1. Tan-awa ang bunga sa imong kinabuhi.

"kaya gikan sa iyang kasingkasing manggula ang mga daotang hunahuna nga maoy mag-aghat kaniya sa pagpatay, sa pagpanapaw, sa mga salawayong butang."

Mateo 15.19

2. Paminawa ang mga pulong nga mogawas sa imong baba.

"Mga bitin--- unsaon ninyo pagsultig mga maayong butang nga daotan man kamo? Kay unsa gani ang nakapuno sa kasingkasing, mao usab ang isulti sa baba.

3. Bantayi ang imong tubag panahon sa mga sitwasyon panghitabo.

"... ayaw ako himoang dato, ni kabos. Hatagi lamang akog kalan-on nga igo ra sa akong gikinahanglan. Kay hatagan mo sobra, tingali unyag moingon ako nga wala ko na ikaw gikinahanglan. Apan kon kabos usab ko, tingalig matintal ako pagpangawat ug mapakaulawan ko ang Dios".

Panutihon 30 8-9

Ang mga pasahe sa itaas usa ka pag-ampo ngadto Dios gikan tawo nga ginganlan ug Agur. Kini nga pag-ampo gikan sa kahadlok nga basin ug mawala siya sa Ginoo kung ugaling moabot kaniya ang sobra nga bahandi. Niini nga pag-ampo iyang giangkong sa Dios nga huyang kaayo ang iyang kasingkasing taliwala sa mga panghitabo nga wala niya ginalaomi. (*Wala ako nagdasig nga imo kining awaton nga pag-ampo kay puwede man kita maka ampo Dios nga iyang himuong kusgan ang atong mga kasingkasing aron dili kita mausab ngadto Kaniya bisan ug unsa ka dako nga pagsulay o panalangin ang moabot kanato.*) Apan kini nga pag-ampo nagpakita kanato ug kamatuoran nga ang atong tubag (response/reactions) panahon sa mga sitwasyon nagpakita anaa sa atong kinasuloran. Ang atong gina-atubang mga sitwasyon ug ang mga panghitabo, maayo man o dili, mopakita sa atong tinuod nga pagkatawo (tinuod "color").

UNSAON PAGBATON PUTLI NGA KASINGKASING

1. Tugoti Dios nga magasusi sa kasingkasing (Salmo 139:23-24)
2. Pag-ampo nga ang Dios moputli sa kasingkasing (Salmo 51:10).
3. Bantay ang imong kasingkasing gikan daotan (Panultihon 4:23, Mateo Buhat
4. Pun-a ang imong kasingkasing sa mga maayong butang (Mateo 12:35, Salmo 119:11).

PAG-APLIKAR NGA PANGUTANA:

- ❖ Unsay mga punto sa mensahe nnga nakig-istorya kanato? Ngano man?
- ❖ Unsay anaa pa sa sulod kanato Unsay motibo atong pagbuhat mga maayong butang, ba para Ginoo?
- ❖ Unsay motibo sa atong pagbuhat ug mga maayong butang, para bas a atong kaugalingon o para sa Ginoo?

PAGLAKAW UBAN SA DIOS (Victorious Life Series: Lesson 11)

“Sa 65 na ang panuigon ni Enoc, may anak siyang lalaki nga si Matusalem. Human matawo si Matusalem, si Enoc nagkinabuhi nga matinumanon sa Dios sa laing 300 ka tuig, ug nakaliwat usab siyag ubang mga anak. Miabot ang iyang panuigon ug 365. Nagmatinumanon siya sa Dios sa tibuok niyang kinabuhi, ug wala na siya igkita kay gikuha man siya sa Dios.”

Genesis 5:21-24

ANG KALAHIAN SA “NAGKINABUHI LANG” UG SA “NAGLAKAW UBAN SA DIOS”

- Ang tawo nga “**nagpuyo lang**” mao kadtong tawo nga nagkinabuhi nga kinaugalingon lang. Wala siya nanginglabot sa Dios ug ang Dios wala nanginglabot kaniya. Nagkinabuhi siya nga minandoan sa iyang mga tawhanong tinguha ug kailibgon.
- Ang tawo nga “**naglakaw sa Dios**” mao kadtong tawo nga nahiusa sa Dios. Nagalakaw siya uban sa “presensiya,” “pabor,” ug “panalangin” sa Dios. Nahilambigit siya sa Dios ug ang Dios usab nahilambigit kaniya. Iyang madunggan ang tingog sa Dios ug mabati niya ang iyang presensiya. Buhi ug lalom ang iyang relasyon sa Dios. Si Enoc usa sa mga tawo nga nahisulat sa Biblia nga naglakaw uban sa Dios.

GIKAN SA PAGLAKAW NGA KINAUGALINGON NGADTO SA PAGLAKAW UBAN SA DIOS

- Si Enoc nagkinabuhi nga nag-iya-ya lang apan sa pag-edad niya ug 65 nagsugod siya pagkinabuhi uban sa Dios sulod sa 300 ka tuig.
- Mao gihapon kita, wala kita natawo nga naglakaw na dayon uban sa Ginoo. Adunay sinugdanan ang atong paglakaw uban sa Dios. Kanus-a? **Sa dihang atong gitugyan ang atong kinabuhi kang Kristo.** Sa atong pagtuo kang Jesus napasaylo ang atong mga sala ug nahiusa kita sa Dios (2 Corinto 5:18-19). Una kita makalakaw uban sa Dios kinahanglan mahiusa usa kita ngadto kaniya, ug si Kristo lang ang makahiusa kanato ngadto sa Dios (Juan 14:6, 1 Timoteo 2:5).

ANG PASABOT SA PAGLAKAW UBAN SA DIOS

Ang paglakaw uban sa Dios nagpasabot nga...

- **Lalom ug buhi ang atong relasyon sa Dios (Marcos 12:28-30)**
- Ang atong relasyon sa Dios usa ka Amahan ngadto sa anak nga relasyon (Mateo 6:6; Roma 8:15-16). Kini naghigot ug lalom nga relasyon (intimacy), Ang una natong tawag (calling) mao ang “paglakaw” uban kaniya ug dili ang “pagtrabaho” uban kaniya. Usahay daghan kaayo kita ug ginabuhat para kaniya nga wala na kitay panahon kaniya sama sa nahitabo kang Marta ngadto kang Jesus (Lukas 10:38-42). Dili nato undangan ang pagpangita sa iyang

Nawong, nga mao ang iyang Buhi nga Presensya (Salmo 119:135). Dili nato walaon ang atong init nga gugma sa Dios (Gipadayag 2:1-5)

2.) Maayo ang atong relasyon sa Dios ug walay babag (Hebreo 11:5)

- Ang mga kristohanon nga nagpuyo pa gihapon sa sala ug nagpaupon pa sa kalibotan (1 Juan 2:15-17) ginatawag sa Dios ug mga “mananapaw” (Santiago 4:4). Apan bisan pa niini ang Dios nahigugma gihapon kanila ug nagatawag nga sila mobiya na sa ilang mga sala ug mobalik na ngadto kaniya (Oseas 3:1-3). Ang paglakaw uban sa Dios nagpasabot nga kita naglakaw nga balaan sama kaniya.

3.) Anaa kita sa hinggpit nga kabubut-on sa Dios (Buhat 16:6-10)

- Ang Kristohanon nga nagalakaw uban sa Dios anaa sa saktong lugar, uban sa saktong mga tawo, ug nagabuhat sa saktong mga butang. Anaa sila sa saktong trabaho, simbahan, ug ministeryo. Nagalakaw sila sa sibo sa panahon (timing) sa Ginoo.

MGA BUNGA SA ATONG PAGLAKAW UBAN SA DIOS

1. Bili (worth) (Mateo 7:21-23).

2. Pagpangalagad (ministry) (Juan 15:5, 16).

3. Pag-uswag ug kalamposan (success) (Deut. 28:2)

4. Maayo nga relasyon sa uban (good relationship) (Marcos 12:30-31).

PAGLAKAW UBAN SA DIOS HANGTOD KUHAON KANA NIYA

- Si Enoc naglakaw uban sa Dios hangtod nga siya gikuha na sa Dios (Genesis 5:24). **Ang importante dili lang ang maayo nga pagsugod kondili ang maayo nga paghuman.** Adunay mga Kristohanon nga maayo ang pagsugod pero dili maayo ang pagtapos. Kinahanglan molahotay kita hangtod sa kahangtoran (Mateo 24:12-13). Ayaw tugoti nga adunay tawo, panulay o mga problema nga mopatay sa atong maayong relasyon sa Dios.

ANG KALAHIAN SA “NAMATAY” UG SA “GIKUHA SA DIOS”

- Daghan sa mga tawo namatay sa dili pa panahon nga dapat sila mamatay. Nahitabo kini tungod kay nagkinabuhi sila sa ila lang kaugalingon ug wala nagalakaw uban sa Dios. Namatay sila tungod sa ilang mga binuhatan o tungod ba kaha sa ubang tawo. Ang uban namatay tungod sa atake sa panulay nganha sa ilang mga kinabuhi. Nahitabo kini tungod kay wala sila nailalom sa panalipod sa Dios. Ang Dios makapanalipod lang kanato kung nagalakaw kita uban Kaniya. Ang kamatayon sa tawo nga wala nagalakaw sa Dios makasusubo kaayo tungod kay ang iyang padulngan mao man ang “linaw nga kalayo,” (lake of fire) nga mao ang ikaduhang kamatayon (Gipadayag 21:8).

- Bisan ug nagalakaw kita uban sa Dios aduna gyuy panahon nga kuhaon na kita sa Dios aron Mauban na Kaniya. Si Enoc wala moagi ug “pisikal” nga kamatayon tungod kay gikuha lang siya dayon sa Dios ug gidala sa langit. Pero kadaghanan kanato kung dili nato maabtan ang pagbalik sa Ginoo nga buhi, moagi gayod ug “pisikal” nga kamatayon (Hebreo 9:27). Kini nga kamatayon dili sa atong kapildihan kondili sa atong kaayohan tungod kay kita gikuha na sa Dios aron mag-uban Kaniya hangtod sa kahangtoran (Juan 11:25-26, Filipos 1:21). Ang kamatayon sa anaa kang Kristo pultahan ngadto sa mas maayo pa nga lugar (Lukas 16:22; Filipos 1:23).

PAG-APLIKAR SA KAUGALINGON:

- Unsay punto nga nakatandog pag-ayo kanato sa atong leksiyon? Ngano man?
- Unsay mga rason nganong ang uban wala makapadayon sa ilang paglakaw sa Dios?
- Makasulti ba kita nga buhi ug lalom ang atong relasyon sa Dios?

NGANONG ANG UBAN NAPALPAK

(Victorious Life Series: Lesson 12)

Ang Dios gusto nga molampos kita sa tanan natong ginabuhat. Dios siya sa kalamposan ug pagpamunga. Kadaogan ug pag-uswag ang iyang kinaiyahan. Maayo ang iyang plano kanato karon ug sa umaabot (Jeremias 29:11). Pero nganong ang uban nagpuyo man gihapon nga pilidro ug palpak nga kinabuhi? Unsay mga hinungdan niini nga unta naga-ampo man sila, nagahatag sa trabaho sa Ginoo, nagaputli sa ilang kaugalingon, ug nangalagad sa Dios? Maghisgot kita ug pito ka posibleng mga hinungdan niini. Kining pito, ang kadaghanang rason ngano ang uban wala makalampos ug makapamunga niining kalibotana nga unta maayo man sila nga mga Kristohanon.

PITO KA RASON NGANONG MAPALPAK ANG TAWO

1.) Dili Kahibalo Modala ug Maayo nga Relasyon (Poor People Skill)

Mga rason nganong ang uban walay maayong relasyon sa ubang mga tawo:

- i. Dili sila kahibalo mo-istorya unsay ilang gusto ngadto sa uban (poor communicator).

- ii. Adunay garbo sa ilang kasingkasing (pride). Ang tawo nga garboso dili kahibalo maminaw sa uban ug tinguha niya nga iyang gusto ang pirme matuman. Nagtuo siya nga kanunay siya ang sakto ug ang uban pirme sayop (self-righteous).
 - iii. Samaran ang ilang mga kasingkasing (pride). Ang tawo nga samaran dali kayo masakitan' ug dali usab kaayo sila makapasakit' sa uban.
 - iv. Adunay pagkadalo sa kuwarta sa ilang kasingkasing (materialistic). Mas gipalabi nila ang mga butang kay sa relasyon sa ilang isigkatawo. Makigrelasyon sila sa uban tungod sa ilang makuha gikan kanila. Kung wala na silay makuha ila nang putlon ang maong relasyon.
 - v. Mga tawo sila nga kanunay nagatan-aw sa tahas (task oriented). Mas ginapalabi nila ang trabaho kay sa relasyon. Ilang ginatan-aw ang uban nga instrument lang nga gamiton para matuman ang ilang katuyoan.
- Kung dili kita kahibalo modala ug relasyon sa uban ilabi na sa mga tawo nga anaa sa duol kanato sila ang motabang nga mapalpak kita niining kinabuhia. Ang mga tawo nga molampos kadtong kahibalo motrabaho kauban ang uban.

2.) Negatibo nga Panghunahuna (Negative Attitude)

- Sa 12 ka tawo nga gipadala ngadto sa yuta nga gisaad sa Dios ngadto sa mga Israelita aron pag-espiya, 10 ang negatibo ug 2 lang ang positibo ug panghunahuna (Numeros 13:25-33). Tungod niini kadto lang gyung duha ang nakasulod sa yuta nga saad.
- Dili kita makapili sa mga panghitabo nga moabot kanato o sa mga Batasan sa mga tawo nga atong makauban pero makapili kita unsay atong hunahunaon (Filipos 4:8). Adunay mga panahon nga dli nato mausab ang atong palibot pero puwede nato mausab ang atong hunahuna. Mausab nato ang atong panlantaw sa kinabuhi sa positibo nga paaagi.

3. Kulang ug Pagtutok (Lack of Focus)

- Dili nato madungan pagbuhat ang tanang maayong butang nga mosulod sa atong mga hunahuna. Ang tawo nga “katag kaayo ug hunahuna” walay mahimong maayo. Si Jesus miiningon nga kadto lang ginapakita sa iyang Amahan nga buhaton maoy iyang ginabuhat (Juan 5:19-20). Kinahanglan kahibalo kita motutok sa mga butang nga ginapabuhat sa Dios nganhi kanato. Ang mga butang nga dili kaayo importante ug walay labot sa atong pagkab-ot sa tawag sa Dios dili na nato buhaton. Tutokan nato ang mga butang nga mas importante ug dili ang mga butang nga walay hinungdan ug nagapabalda lang kanato aron kita magmalapason sa atong gusto mahitabo. (2 Mga Hari 4:29).

4.) Dili Komitado (Weak Commitment)

- Si Jesus wala lang misugod sa kabubut-on sa Amahan apan determinado siya nga taposon kini (Juan 4:34). Tungod sa

iyang pagkakomitado nga humanon ang iyang misyon pagluwas sa mga tawo pinaagi sa pagkamaty didto sa krus' magmalamposon gyud siya sa kataposan. **Ayaw pag sugod ug trabaho nga dili ka komitado paghuman niini** (Panultihon 24:16). Ayaw tugoti nga ang palpak kana. Padayon hangtod mahuman ang tahas sa Dios sa imong kinabuhi.

5.) Dili Andam Mag-usab (Unwillingness to Change)

- Ang Tawo nga kitid kaayo ug panghunahuna walay bunga. Kinahanglan kanunay kita naga-usab ngadto sa pagkamaayo (good to better, better to best). Kung maayo kita kaniadto dapat mas maayo kita karon. Kung maayo kita karon kinahanglan mas maayo pa kita ugma. Kinahanglan kanunay kita naga-usab ngadto sa pagkamaayo (improved) aron mas epektibo pa mohuman sa mga tahas nga angay nato humanon.
- Kinahanglan maminaw kita ug tambag sa uban aron molampos (Panultihon 15:22). Ang tawo nga gusto motubo ug molambo kanunay nagapaminaw sa uban (Panutihon 20:18).

6.) Gusto ug Dali Dayon nga Resulta (Shortcut mentality)

- Nag-ingon ang Biblia nga ang bahandi nga nakuha sa sayon nga paagi dali ra kaayo mawala (Panultihon 20:21). Ang uban gusto moani ug abot apan dili gusto modaro, ug motanom (Panultihon 20:4). Kini nga klase sa kinaiya mohatod kanato sa kapidihan.

- Dili mahimo nga magpunay lamang kita ug damgo ug istorya unsay gusto mahitabo apan dili kita motrabaho (Panultihon 12:11; 14:23). Kinahanglan molihok gayod kita aron makakita ug resulta.

7.) Walay Tumong (No Goals)

- Ang atong pagtuo kinahanglan nabasi sa atong ginalaoman (Hebreo 11:1). Ang atong ginalaoman mao ang atong tumong nga gikan sa Dios. Ang tawo nga walay tumong walay pag-asinso. Ang tumong mao ang atong ginadamgo nga kinahanglan mahitabo. Damgo kini nga adunay gitakda nga panahon kanus-a dapat matuman ug mahitabo. Kinahanglan aduna kitay tumong sa atong relasyon sa Dios, pamilya, trabaho, negosyo, eskuwela, ministryo, ug sa uban pa nato nga ginabuhay. Timan-i ang walay padulngan. Kinahanglan nga ang atong mga ginabuhay sentro sa atong mga gitakda nga tumong. Ang tumong dili motabang sa Dios apan motabang kini kanato.

PAG APLIKAR NGA MGA PANGUTANA:

- Sa pito ka rason nganong mapalpak ang usa ka tawo, pila ang anaa pa kanato? (share)
- Unsay buot ipasabot sa “Dili ka palpak kung ang palpak sa gawas wala nimo gipasulod?”